

**ԳՎԱՌԻ ՊԵՏԱԿԱՆ ՀԱՄԱԼՍԱՐԱՆԻ ՈՒՍԱՆՈՂԱԿԱՆ ԽՈՐՀՐԴԻ
ԿԱՆՈՆԱԴՐՈՒԹՅՈՒՆ**

I. ԸՆԴՀԱՆՈՒՐ ԴՐՈՒՅԹՆԵՐ

1. Գավառի պետական համալսարանի (այսուհետ՝ Համալսարան) ուսանողական խորհուրդը (այսուհետև՝ Խորհուրդ) Համալսարանի ուսանողական ինքնակառավարման, սովորողներին միավորող, նրանց շահերը պաշտպանող, ընտրովի ներկայացուցչական մարմին է:
2. Խորհուրդն իր գործունեությունն իրականացնում է ՀՀ Սահմանադրությանը, ՀՀ գործող օրենսդրությանը, Համալսարանի Կանոնադրությանը և սույն Կանոնադրությանը համապատասխան:
3. Խորհուրդը ներկայացնում է բակալավրիատի և մագիստրատուրայի կրթական աստիճաններում, ասպիրանտուրայում, առկա և հեռակա ուսուցման համակարգերում սովորողներին, արտահայտում և պաշտպանում նրանց շահերը, նպաստում ուսանողների համակողմանի զարգացմանը, ազգային, բարոյական և համամարդկային արժեքների ոգով դաստիարակմանը, ստեղծում կապեր ՀՀ և արտերկրի բուհերի գիտական, կրթական, երիտասարդական, մշակութային, մարզական կազմակերպությունների հետ:
4. Համալսարանի կառավարման մարմինների, նրանց ստորաբաժանումների, Համալսարանում գործող, ինչպես նաև արտահամալսարանական գիտական, կրթական, սոցիալ-մշակութային, երիտասարդական կազմակերպությունների, պետական մարմինների և անհատ անձանց հետ Խորհրդի հարաբերությունները կարգավորվում են Համալսարանի կանոնադրության, սույն Կանոնադրության և պայմանագրերի հիման վրա:
5. Խորհուրդն ունի խորհրդանշան, որը հաստատվում է Խորհրդի ժողովի կողմից:
6. Խորհուրդը գործում է ՀՀ, Գեղարքունիքի մարզ, ք. Գավառ 1201, Հրանտ Հակոբյան 1 հասցեում:

II. ԽՈՐՀՐԴԻ ՆՊԱՏԱԿՆԵՐԸ, ԳՈՐԾԱՌՈՒԹՅՈՒՆԵՐԸ ԵՎ ԻՐԱՎԱՍՈՒԹՅՈՒՆՆԵՐԸ

7.Խորհրդի հիմնական նպատակներն են կրթության կազմակերպման ու որակի ապահովման գործընթացում, Համալսարանի գործունեության մեջ սովորողների սոցիալական դերի և ակտիվության բարձրացումը, նրանց մասնագիտական և ընդհանուր աշխարհայացքային զարգացմանը նպաստումը:

8.Խորհուրդն իր նպատակներին համապատասխան իրականացնում է հետևյալ գործառույթները.

1) Համալսարանի կառավարման մարմիններում սովորողների շահերի ներկայացում և պաշտպանություն,

2)աջակցություն ուսումնական գործընթացի կատարելագործման, ուսանողների առաջադիմության բարձրացման գործընթացներին,

3) սովորողների շրջանում տեղեկատվության տարածում,

4)սովորողների ստեղծագործական ներուժի բացահայտման համար պայմանների ստեղծում,

5) միջոցների ձեռնարկում, որոնք կնպաստեն ուսանողների և դասախոսների արդյունավետ համագործակցությանը,

6)ուսումնական մասնաշենքերում կարգուկանոնի պահպանությանն աջակցություն,

7) սովորողների սոցիալական վիճակի և կենցաղի բարելավմանը միտված միջոցների ձեռնարկում,

8) Համալսարանի ուսանողական կառույցների աշխատանքի համակարգմանը նպաստող այլ միջոցառումների իրականացում,

9) Հանրապետության և արտասահմանյան երիտասարդական, ուսանողական կազմակերպությունների հետ կապերի ստեղծում, միջհամալսարանական ուսանողական համագործակցության զարգացում, աջակցություն ուսանողների փոխանակմանը,

10) սովորողների ակադեմիական առաջադիմության բարձրացման, ուսուցման որակի ապահովման և ծրագրային նորացման վերաբերյալ առաջարկությունների նախապատրաստում և նպաստում դրանց ընդունմանն ու հետևողական իրականացմանը,

11) շրջանավարտների աշխատանքի տեղավորմանն աջակցություն,

12)Համալսարանի շրջանավարտների և գործատուների միջև կապի պահպանում,

13)Համալսարանում սովորողների ֆիզիկական դաստիարակության և առողջ ապրելակերպի մշակույթի զարգացմանն աջակցություն,

14) ուսանողական միջոցառումների անցկացում,

15) համակողմանի աջակցություն շնորհալի ուսանողների առաջընթացին:

9. Սահմանված նպատակներն ու գործառույթներն իրականացնելու համար Խորհուրդն իրավասու է.

- 1) որոշելու իր կառուցվածքը,
- 2) կազմակերպելու համատեղ աշխատանք պետական և հասարակական կազմակերպությունների հետ և մասնակցելու դրանց՝ իր ներկայացուցիչ պատվիրակների միջոցով,
- 3) մշակելու նախագծեր՝ արտաքին ֆինանսական աղբյուրներից միջոցներ ներգրավելու համար,
- 4) իրականացնելու միջոցառումներ ուսանողների՝ Համալսարանի կանոնադրությամբ նախատեսված իրավունքների պաշտպանության համար,
- 5) օգտագործելու Համալսարանի տեղեկատվական հնարավորությունները՝ ուսանողական կյանքը համակողմանիորեն լուսաբանելու և Խորհրդի որոշումների մասին ուսանողներին իրազեկելու համար,
- 6) Համալսարանի կանոնադրությանը համապատասխան ստեղծելու ուսանողական, մշակութային, մարզական միություններ, ըստ նախասիրությունների՝ ակումբներ, կազմակերպելու ուսանողական օլիմպիադաներ, փառատոններ, համերգներ, հանդեսներ և ուսանողական առօրյան հետաքրքիր դարձնող այլ միջոցառումներ,
- 7) մասնակցելու ուսանողների իրավունքներին ու օրինական շահերին առնչվող ակտերի մշակմանն ու ընդունմանը,
- 8) Համալսարանի հոգաբարձուների խորհրդի, գիտական խորհրդի քննարկմանը ներկայացնելու ուսանողությանը վերաբերող հիմնահարցեր,
- 9) ՀՀ օրենսդրությամբ սահմանված կարգով, Համալսարանի կանոնադրության համաձայն՝ ունենալու սովորողների ներկայացուցիչներ Համալսարանի կառավարման մարմիններում՝ ապահովելով ուսանողների մասնակցությունը Համալսարանի (ֆակուլտետների, բաժինների) գործունեությանը վերաբերող կարևոր հարցերի լուծմանը,
- 10) մասնակցելու սովորողների սոցիալական օգնության կազմակերպման, արտաուսումնական ծրագրերի իրականացման գործընթացներին,
- 11) առաջարկություններ ներկայացնելու՝ ներհամալսարանական անվանական կրթաթոշակներ և մրցանակներ հիմնելու վերաբերյալ,
- 12) մասնակցելու սովորողների ակադեմիական առաջադիմության և կարգապահական հարցերի քննարկման և որոշումների կայացման գործընթացներին,
- 13) միջնորդելու Համալսարանի ղեկավարությանը՝ զեղչելու սոցիալապես անապահով, ուսման բարձր առաջադիմություն, օրինակելի վարք ունեցող ուսանողների ուսման վարձը,
- 14) միջնորդելու Համալսարանի հասարակական կյանքին ակտիվ մասնակցություն ունեցող ուսանողների պարզևատրման համար,

15) առաջադրված խնդիրների լուծման համար Խորհրդի կազմը համալրելու նոր անդամներով,

16) սահմանված կարգով բողոքարկելու սովորողներին վերաբերող հրամաններն ու կարգադրությունները,

17) դիմելու և Համալսարանում իրականացնելու դրամաշնորհային ծրագրեր,

18) իր իրավասության շրջանակներում լուծելու այլ հարցեր:

III. ԽՈՐՀՐԴԻ ԿԱՌՈՒՑՎԱԾՔԸ, ԳՈՐԾՈՒՆԵՈՒԹՅՈՒՆԸ

10. Խորհուրդը ձևավորվում է Համալսարանի ֆակուլտետների ուսանողների ներկայացուցիչների կողմից՝ ընտրության միջոցով, 20 ուսանողից 1 պատվիրակ սկզբունքով: Խորհրդի լիազորությունների ժամկետը 2 տարի է, որի ընթացքում կարող է տեղի ունենալ Խորհրդի անդամների մասնակի շրջափոխություն՝ անդամների Համալսարանն ավարտելու և նոր ուսումնական տարում ուսանողների ընդունելության հետ կապված: Ի պաշտոնե Խորհրդի անդամներ են Համալսարանի ֆակուլտետների ուսանողական խորհուրդների նախագահները:

11. Խորհրդի ղեկավար մարմիններն են՝

1) Խորհրդի ժողովը,

2) նախագահությունը,

3) նախագահը:

12. Մշտական գործող կառուցվածքային ստորաբաժանումներն են՝

1) հանձնաժողովները,

2) Համալսարանի ֆակուլտետների ուսանողական խորհուրդները:

13. Խորհրդի ժողովը գործում է հետևյալ կարգով.

1) Խորհրդի ժողովները գումարվում են կիսամյակն առնվազն մեկ անգամ: Արտահերթ ժողովներ հրավիրվում են Խորհրդի նախագահի, նախագահության կամ Խորհրդի անդամների առնվազն 1/3-ի պահանջով,

2) Խորհրդի ժողովները համարվում են իրավազոր՝ Խորհրդի անդամների առնվազն 1/2-ի մասնակցության դեպքում: Խորհրդի որոշումներն ընդունվում են ժողովին ներկա անդամների ձայների պարզ մեծամասնությամբ, բաց քվեարկությամբ, եթե Խորհուրդն այդ մասին այլ որոշում չի ընդունում,

3) ընդունում է Խորհրդի կանոնադրությունը և նրանում կատարում փոփոխություններ,

4) ուսանողական համակազմից առաջադրում է Համալսարանի հոգաբարձուների Խորհրդի անդամության թեկնածուներ,

5) ընտրում է Խորհրդի նախագահություն,

6) ընտրում է Խորհրդի նախագահ 2 տարի ժամկետով: Խորհրդի նախագահի ընտրությունը կատարվում է Խորհրդի ժողովում՝ փակ, գաղտնի քվեարկությամբ:

Նախագահի թեկնածուն համարվում է ընտրված, եթե նրա օգտին քվեարկել է Խորհրդի ժողովին ներկա անդամների կեսից ավելին,

7) հաստատում է Խորհրդի գործունեության տարեկան աշխատանքային ծրագիրը,

8) լսում և քննարկում է Խորհրդի նախագահի, հանձնաժողովների, Համալսարանի ֆակուլտետների ուսանողական խորհուրդների հաշվետվությունները,

9) լսում և քննարկում է նախագահության, հանձնաժողովների, Համալսարանի ֆակուլտետների ուսանողական խորհուրդների կողմից ներկայացվող հարցերը,

10) հաստատում է Խորհրդի աշխատակարգը,

11) հաստատում կամ չեղյալ է համարում Խորհրդի անունից կնքված պայմանագրերն ու մյուս փաստաթղթերը,

12) քննարկում է այլ հարցեր և ընդունում համապատասխան որոշումներ:

14. Խորհրդի ժողովների միջև ընկած ժամանակահատվածում Խորհրդի մշտական գործող կոլեգիալ ղեկավար մարմինը Խորհրդի ժողովում ընտրված նախագահությունն է: Նախագահության ի պաշտոնե անդամներն են Խորհրդի նախագահը, Համալսարանի ֆակուլտետների ուսանողական խորհուրդների նախագահները: Նախագահության մնացած անդամները ընտրվում են ժողովի անդամներից, Խորհրդի ժողովում: Նախագահության անդամը համարվում է ընտրված, եթե նրա օգտին քվեարկել են Խորհրդի ներկա անդամների կեսից ավելին:

15. Նախագահությունը գումարում է հերթական և արտահերթ նիստեր: Նախագահության արտահերթ նիստերը հրավիրվում են նախագահի կամ նախագահության առնվազն հինգ անդամի գրավոր առաջարկությամբ: Նախագահության նիստը համարվում է իրավազոր, եթե նիստին մասնակցում են նախագահության անդամների առնվազն 1/2-ը:

16. Խորհրդի նախագահությունն իրականացնում է հետևյալ գործառույթները.

1) պատրաստում է Խորհրդի ժողովների քննարկմանը ներկայացվող հարցեր և կազմակերպում Խորհրդի ժողովների որոշումների իրականացումը,

2) որոշում է Խորհրդի ժողովի անցկացման օրը և հաստատում օրակարգը,

3) Խորհուրդը համալրում է նոր անդամներով,

4) մշակում, քննարկում և ընդունում է Խորհրդի գործունեության տարեկան աշխատանքային ծրագիրը,

5) Նախագահությունը լուծում է ընթացիկ հարցեր, համակարգում է Համալսարանի ֆակուլտետների ուսանողական խորհուրդների գործունեությունը,

6) իրականացնում է այլ գործառույթներ՝ Կանոնադրությանը համապատասխան:

17. Խորհրդի նախագահն իրականացնում է հետևյալ գործառույթները.

1) ղեկավարում է ուսանողական խորհուրդը և կազմակերպում Խորհրդի աշխատանքը,

2) գլխավորում է Խորհրդի նախագահությունը,

- 3) բաշխում է պարտականությունները հանձնաժողովների ղեկավարների միջև,
 - 4) ներկայացնում է Խորհուրդը պետական և տեղական ինքնակառավարման մարմիններում, հասարակական կազմակերպություններում, զանգվածային լրատվության միջոցներում,
 - 5) նախագահության հաստատմանն է ներկայացնում Խորհրդի գործունեության ծրագիրը,
 - 6) իր գործունեության վերաբերյալ հաշվետվություն է ներկայացնում Խորհրդին,
 - 7) իր բացակայության ժամանակ նախագահի պարտականությունների կատարումը վերապահում է Խորհրդի փոխնախագահին,
 - 8) իրականացնում է սույն Կանոնադրությամբ նախատեսված այլ լիազորություններ,
18. Խորհրդի փոխնախագահի թեկնածությունն առաջադրվում է նախագահության անդամներից, նախագահի կողմից և հաստատվում նախագահության նիստում:
19. Խորհրդի փոխնախագահը մասնակցում է Խորհրդի աշխատանքների ղեկավարմանը, համակարգում է Համալսարանի ֆակուլտետների ուսանողական խորհուրդների աշխատանքները, հետևում է Խորհրդի ընդունած որոշումների կատարմանը, համակարգում է հանձնաժողովների աշխատանքը, կատարում է Խորհրդի նախագահի հանձնարարականները:
20. Խորհրդի քարտուղարի թեկնածությունն առաջադրվում է նախագահության անդամներից, նախագահի կողմից և հաստատվում նախագահության նիստում:
21. Խորհրդի քարտուղարը կազմակերպում է Խորհրդի գործավարությունը, կատարում կազմակերպական աշխատանքներ:
22. Խորհուրդն իր գործունեության հիմնական ուղղությունների իրականացման նպատակով ձևավորում է հետևյալ հանձնաժողովները՝
- 1) ուսումնագիտական,
 - 2) սոցիալ-մշակութային,
 - 3) մարզական,
 - 4) շրջանավարտների հետ կապի,
 - 5) կարգապահական,
 - 6) այլ:
23. Խորհրդի հանձնաժողովների կազմում կարող են ընդգրկվել նաև Խորհրդի անդամ չհանդիսացող ուսանողներ:
24. Հանձնաժողովի նախագահների թեկնածություններն առաջադրվում են Խորհրդի նախագահի կողմից և հաստատվում նախագահության նիստում:
25. Հանձնաժողովի նախագահներն իրականացնում են հետևյալ գործառույթները.
- 1) իրականացնում են կոնկրետ ոլորտների հանձնաժողովների ղեկավարությունը,

2) իրենց ղեկավարած հանձնաժողովների կազմերը լրացնելու համար նախագահության հաստատմանն են ներկայացնում համապատասխան թեկնածություններ,

3) ընթացիկ ժամանակահատվածի համար կազմում են հանձնաժողովների աշխատանքային ծրագրերը,

4) համագործակցում են Համալսարանի կառուցվածքային ստորաբաժանումների հետ՝ հանձնաժողովների գործունեությանը վերաբերող հարցերով,

5) Նախագահի հանձնարարությամբ կարող են ներկայացնել խորհուրդը պետական և տեղական ինքնակառավարման մարմիններում, հասարակական կազմակերպություններում, զանգվածային լրատվության միջոցներում,

6) հաշվետվություն են ներկայացնում հանձնաժողովների աշխատանքի վերաբերյալ նախագահությանը, խորհրդին:

26. Համալսարանի ֆակուլտետների ուսանողական խորհուրդները ձևավորվում են համապատասխան ֆակուլտետի ուսանողներից՝ ընտրովի ներկայացուցչական սկզբունքով:

27. Համալսարանի ֆակուլտետների ուսանողական խորհուրդների նախագահներին և անդամներին ընտրում են համապատասխան ֆակուլտետների ուսանողները:

28. Համալսարանի ֆակուլտետների ուսանողական խորհուրդների նախագահի անբավարար աշխատանքի, պարտականությունների թերի կատարման դեպքում խորհրդի նախագահության կողմից վերջինիս կարող է հայտնվել անվստահություն, որից հետո երկշաբաթյա ժամկետում ընտրվում է նոր նախագահ:

29. Համալսարանի ֆակուլտետների ուսանողական խորհուրդներն իրականացնում են հետևյալ գործառույթները.

1) ընտրում են Համալսարանի խորհրդի անդամության թեկնածուներ,

2) ընտրում են ներկայացուցիչներ Համալսարանի Ուսանողական խորհրդի ժողովում,

3) հետևում են ուսանողների իրավունքների իրականացմանը և պարտականությունների կատարմանը,

4) կենսագործում են խորհրդի և նախագահության որոշումները,

5) համագործակցում են համապատասխան դեկանատների, Համալսարանի կառուցվածքային ստորաբաժանումների հետ, մասնակցում են դեկանատների կողմից կազմակերպվող աշխատանքների իրականացմանը, աշխատանքային հարցերի քննարկմանը,

6) կատարած աշխատանքների վերաբերյալ հաշվետվություն են ներկայացնում խորհրդին և նախագահությանը,

7) իրենց իրավասությունների շրջանակներում իրականացնում են այլ գործառույթներ:

IV. ԽՈՐՀՐԴԻ ԱՆՂԱՄՆԵՐԻ ԻՐԱՎՈՒՆՔՆԵՐԸ ԵՎ ՊԱՐՏԱԿԱՆՈՒԹՅՈՒՆՆԵՐԸ

30. Խորհրդի անդամներն իրավունք ունեն.

- 1) ընտրել և ընտրվել Խորհրդի ղեկավար մարմիններում,
- 2) մասնակցել Խորհրդի կողմից իրականացվող ծրագրերին,
- 3) Խորհրդի ղեկավար կառույցներին ներկայացնել առաջարկություններ և դիտողություններ,
- 4) ստանալ անհրաժեշտ տեղեկատվություն Խորհրդի աշխատանքի վերաբերյալ,
- 5) դուրս գալ Խորհրդի կազմից՝ նախագահությանը ներկայացվող գրավոր դիմումի համաձայն:

31. Խորհրդի անդամները պարտավոր են.

- 1) ապահովել Խորհրդի արդյունավետ գործունեությունը,
- 2) ակտիվ մասնակցություն ցուցաբերել Խորհրդի կողմից անցկացվող միջոցառումների ծրագրերի մշակմանը և դրանց կենսագործմանը,
- 3) կատարել Խորհրդի ղեկավար մարմինների որոշումները,
- 4) կատարել ստանձնած պարտավորությունները,
- 5) խուսափել գործողություններից, որոնք կարող են վնասել Խորհրդի կամ նրա անդամների հեղինակությանը,
- 6) կատարել սույն Կանոնադրությամբ նախատեսված այլ պարտականություններ:

32. Խորհրդի անդամների լիազորությունները կարող են վաղաժամկետ դադարեցվել հետևյալ դեպքերում.

- 1) Նախագահության որոշմամբ՝ ժողովներից պարբերաբար բացակայելու, Խորհրդի աշխատանքից խուսափելու, որոշումները չկատարելու, կարգապահական խախտումների և Համալսարանի կանոնադրությամբ սահմանված՝ ուսանողի պարտականությունները չկատարելու դեպքերում,
- 2) Համալսարանի ֆակուլտետների Խորհրդի կողմից անվստահություն հայտնելու դեպքում՝ նույն Խորհրդի ժողովի որոշմամբ,
- 3) ուսումնառությունն ավարտելուց հետո,
- 4) Համալսարանից հեռացվելու կամ ազատվելու դեպքում,
- 5) անձնական դիմումի համաձայն:
- 6) Խորհրդի անդամի լիազորությունների դադարեցման մասին որոշումը ընդունում է Խորհրդի նախագահությունը:

V. ԽՈՐՀՐԴԻ ՖԻՆԱՆՍԱԿԱՆ ՄԻՋՈՑՆԵՐԸ

33. Խորհուրդն անվճար օգտվում է Համալսարանի տարածքից, գույքային, նյութատեխնիկական միջոցներից:

34. Խորհրդի հիմնական ֆինանսական միջոցները գոյանում են Համալսարանի բյուջեից կատարվող հատկացումներից:

35. Խորհրդի ֆինանսական միջոցները կարող են գոյանալ նաև հանգանակություններից, նվիրատվություններից, դրամաշնորհային ծրագրերից և Համալսարանի Կանոնադրությանը, սույն Կանոնադրությանը չհակասող և ՀՀ օրենսդրությամբ չարգելված այլ աղբյուրներից:

36. Խորհրդի նյութական և ֆինանսական միջոցները տնօրինում են Խորհրդի նախագահը կամ նրա կողմից լիազորված անձինք: Ֆինանսական ծախսերը իրականացվում են Խորհրդի նախագահության որոշմամբ, որոնց մասին Խորհրդի նախագահը հաշվետվություն է ներկայացնում Խորհրդին և Նախագահությանը:

VI. ԼՈՒԾԱՐՈՒՄԸ ԵՎ ՎԵՐԱԿԱԶՄԱՎՈՐՈՒՄԸ.

37. Խորհուրդը լուծարվում և վերակազմավորվում է ՀՀ օրենսդրությամբ և Համալսարանի Կանոնադրությամբ նախատեսված դեպքերում ու կարգով, Խորհրդի անդամների 2/3-ի որոշմամբ: